

Communicaziun als meds da massa

Profil cun Urs Cadruvi – Il Cussegl dal public SRG.R prenda posiziun

Mustér, ils 21-09-2017

Manipulà u betg? Questa dumonda è stada en il center da las discussiuns da la terza tschentada 2017 dal Cussegl dal public SRG.R ils 13 da settember. Il «Profil» cun Urs Cadruvi dals 20 da matg ha chaschunà differentas emoziuns e reacziuns. Plinavant ha il Cussegl dal public tractà l'emissiun da radio «Profil» en general, l'emissiun d'infurmaziun da stad da la televisiun rumantscha «sil punct», e las novitads regionalas online.

Profil – emissiuon emnila en il Radio Rumantsch

«Profil» è dapi onns in'emissiun da tschep dal program da radio da RTR. Mintgamai la sonda avantmezdi vegn ina persuna purtretada aifer 40 minutas d'inA moderaturA entras in'intervista che munta il fil cotschen per preschentar la persuna e sia vita. Ina part integrala da l'emissiun è musica tschernida dal giast. Da las otg emissiuons tadladas da la grupp da lavur èn set «Profils» stads da moda usitada. L'emissiun è interessanta ed ils protagonists stattan e restan en il center. La furma è constanta e solida e correspunda a quella dals ultims onns. Differenzas datti tar la moderaziun, nua che la grupp ha constatà divers nivels da qualitat. Chatter e perseguitar il fil cotschen dal discurs senza sa repeter, cunzunt en la fasa finala «chavazzins», na vegn betg adina ademplì. Mantegnair la survista a moda rutinada è indispensabel, gist sin quest sector.

Profil dals 20 da matg cun Urs Cadruvi - dischequilibrà ma betg manipulà

Undas nunusitadas ha bittà il «Profil» dals 20 da matg cun Urs Cadruvi, anteriur secretari general da la Lia Rumantscha. Il Cussegl dal public ha perquai tractà quest Profil separà. I ha dà ina discussiun extendida e fundada cun puncts da

vista divergents. Ina gronda part dal Cussegl dal public è stada da l'opiniun ch'il Profil saja bain stà nunusità en sia furma, quai tant nà da l'intent da l'emissiun sco era dal stil da moderar. Dentant è il Profil cun Urs Cadruvi vegnì giuditgà sco betg manipulà. Singulas persunas avevan numnadamain rinfatschà ad RTR d'avair laschà manipular dals adversaris dad Urs Cadruvi. Ord vista dal Cussegl dil public SRG.R avessan ins dentant già da communitgar avant u schizunt durant l'emissiun davart ina midada da furma da quest Profil. Quai avess franc creà chapientscha empè da trumpadas tar ina part da l'auditori.

«sil punct» – emissiu d'infurmaziun da la Televisiun Rumantscha

Er questa stad ha «sil punct» infurmà sin SRF 1 durant dus mais davart las actualitads. Ils resultats d'observaziun èn ordvart positivs e las remartgas da l'onn passà han fatg effect. La grupp observanta dal Cussegl dal public ha constatà plirs meglieraments en paregl cun l'onn passà. Tranter auter la lunghezza da l'emissiun, la relevanza da las contribuziuns variantas e la moda e maniera da moderaziun. La grupp da lavur atesta oravant tut a las moderaturas ed als moderaturs auta qualitad, autenticitad e buna empatia. La grupp observanta giuditgescha l'emissiun «sil punct» sco pli lucca e divertenta ch'il «Telesguard». Tenor la grupp pudess l'emissiun schizunt cuzzar pli ditg che quai ch'igl è actualmain il cas. La convergenza cun l'internet e las raits socialas per far attent sin l'emissiun è necessaria e nizzaivla, po dentant vegnir curregida cun maletgs da basa anc pli expressivs.

Schebain i vegn a dar la stad 2018 ina cuntinuaziun da «sil punct» n'è anc betg decidì.

Novitads regionalas sin rtr.ch

Ina terza grupp ha prendì sut la marella las novitads regionalas sin rtr.ch. La clera structura da la pagina d'internet gida il visitader da chattar svelt quai ch'el tschertga. Era infurmescha RTR a moda exemplarica e svelta da tuttas novas regionalas, en spezial ord terra rumantscha, insatge unic en il Grischun che vegn apprezzà ed utilisà da blers pliras giadas a di. La grupp deplorescha ch'i na dat betg la pussaivladad d'infurmar ils visitaders da la pagina cun in'opziun

da «push» davart novitads urgentas. RTR è conscient da questa mancanza, ina app specifica RTR, che pudess schliar quest fatg, na vegni dentant betg a dar il proxim temp. RTR vegn dentant a rinforzar l'activitad da newsletters. Emprimas experientschas èn stadas ordvart motivantas.

In sguard en il futur

Il Cussegl dal public ha tschernì trais novs temas per la seduta dals 22 da november 2017: Co ha RTR rapportà davart las bovas da Bondo, co plascha il project sur redacziunal «HelveCHia» e co gartegian videos cun tun e text publitgads online? En sia seduta finala dal onn 2017 festivescha il Cussegl dal public SRG.R ses giubileum da 25 onns existenza.

Tschertgà nova fatscha

Cun l'entschatta november banduna Ursina Haller il Cussegl dal public SRG.R Ad ella admetta il president en il num da tut las commembras ed ils commembers da quest gremi in grond engraziament e buns giavischs per il futur. Sia successiun vegn reglada enfin l'entschatta 2018.

Infurmaziuns davart il Cussegl dal public SRG.R

Il Cussegl dal public è in gremi consultativ independent ch'accumpogna la lavur ed il svilup dal program da RTR Radiotelevision Svizra Rumantscha cun constataziuns e propostas. Il Cussegl dal public sa raduna per regola quatter giadas ad onn. El observa singulas purschidas da program, emissiuns ed offertas online da RTR. Il Cussegl dal public SRG.R procura per in stretg contact tranter ils responsabels dal program ed il public. El sa cumpona da 15 commembers.

Per dumondas ed ulteriuras infurmaziuns:

Roger Tuor, president dal Cussegl dal public SRG.R, telefonin 079 436 34 87

Sandra Carisch-Killias, secretariat SRG.R, telefon 081 255 79 79